

四庫全書

子部

欽定四庫全書

子部

翰苑新書別集卷

九至
十二

詳校官中書臣葉元符

主事臣祁韻士覆勘

總校官知縣臣楊懋珩

校對官中書臣牛孫文

謄錄監生臣王宜

欽定四庫全書

翰苑新書別集卷九

朱表

明堂大禮前於天慶觀啟建預告上九位五嶽
四瀆道場滿散朱表一通

劉後村

伏以宗祈練日將講緡儀先事告期冀歆精意諒天心
之眷顧相歲事之豐登祀典用成皇圖有永

明堂大禮禮畢於天慶觀啟建告謝滿散朱表

一通

伏以奉柩鬯以精禋已蒙嘉應薦蘋繁而昭答庸罄微忱伏願帝鑒孔昭天休滋至九扈奏金穰之喜四時調玉燭之和

表文

明堂禮畢奏謝諸陵攢宮表文 劉後村

伏以歲詞周寢備芬芬苾苾之儀徵福漢陵瞻鬱鬱蔥蔥之氣威靈如在裡祀克成仰先烈以興懷薦微忱而

推謝

青詞

明堂大禮前於天慶觀啟建預告上九位五嶽
四瀆道場青詞七通係一詞 劉後村

伏以剛日載消將展儀於宗祀先期加謹敢徼福於高
穹俯竭精虔仰祈隲相普錫豐年之慶迄臻熙典之成
大乙宮啟建明堂大禮預告祈晴道場滿散設
醮一千二百分位青詞一首 劉後村

伏以秩祀杪秋將告虔於重屋先期決日敢徵福於殊
庭今太史之龜筮叶從若有司之籩豆已戒惟陰晴之
未定蓋夙夜之靡寧寅和綠章仰祈蒼昊伏願瓣香上
格列宿下臨圓魄中天映黃流而同色霽華麗曉儼玉
路之無塵

制司上元青詞

方秋崖

一元始萬物肅迎九炁之臨五福賜庶民丕對三陽之
泰延淑式瞻於玉境蠲誠誕啟夫瓊書臣惟此淮濱介

於邊圉螭頭雲集屢驚鴻鴈之居蠱尾毒搖未撤貔貅
之戍正恐廢犂鋤於春畝願言洗兵甲於天河爰率彝
章敷聞懇款敢望歛時景貺瞻我昌期豈惟淮海之東
桑麻如舊將使關河之北草木皆寧此臣至誠惟天善
應

上元建醮青詞

戴象麓

歲開新序夫興物以為春節屆上元吏為民而祈福痛
茲南楚三載寇經加以西疇連年旱歉幸上帝深哀其

无告而去歲特畀之有秋民有一飽而懼吏免百憂之
責覺今新歲漸復舊時天賜之休人何不報忻值銀燈
之夕肅陳玉笈之儀上答帝休下祈民貺伏願玉清錫
羨璇極垂慈百里風同各安士農工商之業五鄉日靖
永消水火盜賊之虞

督視府開府青詞

方秋崖

王事靡盬遡炎暑以徂征帝命不違假祥飈而有請惟
皇祚宋昭假順天伏念臣本乏脩能誤膺煩使躡躋兩

地自知鼯鼠之技窮起視三陟但覺風鶴之驚屢使宸
扆未安於丙枕在廟堂敢諉於甲兵乃將威命以董師
邊即陪都而開府蓋以主憂臣辱事不可以辭難然當
內阻外訌材豈堪於任重惟列聖涵濡之澤至厚惟皇
天顧謫之命寢隆雖臣之愚有相之道用冒聞於上帝
其薦祐於我家天德好生帝心悔禍兵以不殺為武毋
驚羽擻之塵國之大事在我克固金湯之業凡臣所乞
罔敢以私

淮東制司黃錄青詞

方秋崖

寇為不道長淮厥鋒鏑之腥相寄非材屬部失金湯之
固痛念生靈之塗炭曷伸冤恨於幽泉流涕其滂拊膺
何及臣惟滁支郡當賊要衝心竊危之形勢實難於固
守疏聞屢矣規模盍亟於移屯曾微初是之什三猶覲
自存於萬一憬彼熊羆之南下盡驅牙爪以東侵瓜城
驟合於重圍守將誓言於死鬪夫何飛石適會麾軍星
實中營誰則為之主者雲崩堅壘天乎尚忍言哉此繇

制帥之駕庸坐致兵民於魚肉敢忘宜薦少塞哀摧伏
願簡在穆清愍茲荼毒忠魂如在足令守虎豹之關羣
姓何辜罔俾滯黠魑之野大軫好生之德亟開悔禍之
期

廣東倉入宅青詞

劉後村

起家一出甚矣勞生乘傳載馳幸而善達輒陳悃素曷
叩昊蒼伏念臣久分退藏忽叨臨遣白頭慈母老戀家
山黃吻小兒疾留道路雖百指檀藥而無恙然寸心墮

獲而靡寧茲選剛辰將趨公宇爰舉祓除之典冀垂覆
幬之仁恭願憫此艱勤錫之福順新書方急若為寬比
屋之嘆愁舊學云何夫豈在全家之飽煖誓殫薄力仰
答厚恩

建天香醮青詞

戴象麓

尺地安居竊九重之天庇爐烟致敬焚一片之心香物
雖薄而瀆尊意實存於報本仰祈帝鑒俯察愚衷赦其
動作之憊錫以保全之福常情不知止足愈有愈求惟

臣但願平安無災無難

景獻邸生日青詞

方秋崖

七月流火聿臨初度之期五福錫民式邇中元之慶用
延景御肅啟明神伏念臣世系麟宗恩榮鵲印自頂及
踵罔非君父之仁以口語心莫報乾坤之造永懷際遇
敢迪齋明伏願昊極溥臨寰區嘉靖文王本支百世休
有烈光上帝監觀四方自求伊祐惟忠惟孝不震不騰

福國生日青詞

劉後村

卷九
歲華已晚不勝喜懼之情天聽甚卑輒瀝精誠之禱伏
念臣妾頽然衰景屆此始生雖瞻視之逾昏尚筋骸之
可勉老者祝哽祝噎粗適旨甘常情欲安欲生矧侵耄
耄敬憑綠奏輒瀝丹忱伏願矜此餘齡錫之晚福斑衣
雜遝清溫相踵於高堂錦誥便蕃湯沐更封於大國

太夫人生日青詞

劉後村

人羨久生顧餘齡而自慨天無私覆然善願之必從伏
念臣妾某早染世塵晚耽禪悅駸駸耄耄久不出於鄉

間碌碌諸兒粗能當於門戶旨甘無闕湯熨少停人以
為衰老之榮已則有滿盈之懼茲因誕日敬叩高穹伏
願鑒此精虔畀之壽嘏大國賜湯沐切冀新恩百年曰
期願庶延暮景

乙卯後村生日青詞

劉後村

采薪之憂命懸一瞬勿藥之喜恩等再生假以餘齡仁
哉洪造伏念臣某官情已薄年事浸高去國為農圃之
歸罷祠絕庖廩之繼尚為病撓可見身灾窮則呼天嘗

呻吟而號痛齋可事帝果奮起於沉綿不揆螻螻之微
輒羞豺獫之報伏望神祇叶佑星曜順行屏岐伯之書
少停湯熨拜弘景之疏遂挂衣冠

趙端明為兄保安青詞

方秋崖

兄弟急難真切鵲鴒之念天地明察豈遺螻螻之誠庸
肅叩於穹隆輒籲聞其疾痛伏念臣長兄具官臣某摧
頽一老遭罹百憂丘嫂喪明久有進蟻之懼女姪夭折
不勝舐犢之悲良用感傷積成衰病忽有來於使者若

將屬其子然讀且驚疑遠難候問永惟手足之誼重亟
欲腹心之疾瘳敢以祈禳庶其康復伏願大垂仁育少
鑒友恭惟有三荆更借桑榆之暖誰不百歲覲回草木
之春

祈雨青詞六月十三日

戴象麓

六月不雨農望歲以深憂三日為霖吏率民而哀請合
衆忱而再瀆冀帝意之一回伏念臣某等各無寸長全
仰一稔柰緣謬政遂召乾暘自前月以至今苦旱魃之

為虐雲欲幕天而吹散雨纔灑地而捲空雖間沐於沾
濡終未蒙於優渥敬陳雷醺虔叩天閭伏願璇極垂慈
玉真賜憫速回飈馭使南箕不可簸揚立勅雨師挽西
江以救轍涸

祈雨青詞

戴象麓

吏慚無狀致時雨之愆期民實何辜叩神天而請命痛
惟彫邑率多旱田土高仰而無源穗方吐而未實政資
膏潤忽苦旱乾農如倒垂吏莫逃責若遲之五日而雨

不至則茫然一歲之計皆空豐荒只決於旦夕之間利害全資於膚寸之澤為勢甚亟惟天賜濟錫以甘霖救其殘命重念數年之轉徙僅此相安全資三日之沾濡俾之一飽

江東祈雨青詞

劉後村

嗟我農夫苦亢陽之為沴惟皇上帝忍膏澤之尚屯俯陳怵惕之情仰瀆穹窿之聽伏念臣自入疆而來訪知編戶之創瘼數口之家鮮能宿飽一年之計尤仰早收

方彌望以如雲忽兼旬而渴雨深恐子遺之黎庶不能
自振於儉荒惟暑氣之蘊隆欲流金石彼原田之秀實
將化堇荼列城若處於焚煖近境纔蒙於霑灑倘慳後
惠必廢前勞合一路之哀鳴叫九閭而上訴伏惟矜其
誠至賜以感通若潤澤之敢不盡微臣之職俾滂沱矣
庶幾全大造之功

謝雨青詞

戴象麓

閔時不雨屢干鴻造之私降監自天疊拜龍湫之澤雖

真宰未嘗責報然愚情敢不知歸伏念臣某試邑罔功
頻年遭旱每投誠於三井常得請於九閭至神如響之
從甘霖隨車而至茲復蒙於加霈庸敬謝於元功伏願
璇極垂慈玉京賜憫幸令南楚既沾潤澤之仁繼此西
成更覲始終之惠

祈晴青詞

吳雨崑

十月納稼乃久阻於積陰上帝鑒民望特回於洪造曲
赦干和之罪普垂乃粒之恩伏念臣等憂國願豐以食

為命賸今歲穀多不稔半已青空而初冬雨復害成又
將黑腐棲畝殆幾於坐視腰鎌直待於連晴願令今日
之清明收藏俱便庶无田里之愁嘆饑饉潛消

里社禳災

劉後村

思患而豫防人情至切不言而善應天聽甚卑迺率耆
倪共祈穹昊伏念自冬至臘厥證常暘風日燥剛水泉
乾涸連甍接棟深虞沴氣之行曲突徙薪思弭融風之
變俗相恐動古有檜禳懷凜凜之深憂遂罄罄而上懇

伏願錫皇極之福念民生之艱驅厲鬼之妖咸躋仁壽
遂畢方之恠永息驚譌

為二姪追薦惠州弟

劉後村

丹旄言旋陟謁愴十旬之隔赤章哀籲扣閭冀一念之
通伏念臣等先父臣某奮自孤童安於拙宦補孝子循
蘭陔之什久矣栖遲慕前賢守鬱林之風過於清苦凡
今日寸地把茅之苟有皆平生節衣縮食之所營云胡
夏鵬之妖莫起河魚之疾野吏之亭長在父老共悲善

和之宅依然主人不返雨降露濡動輒悽愴水浮陸走
幸無震驚敢伸人子之情敬采道家之說伏願回乾坤
之大造鑒草土之微忱逝者如斯夫欲承顏而永訣魂
兮歸來些寧與魄以俱沉脫離幽陰周游冲漠

賽願回薦青詞

戴象麓

百年中訣痛深去後之思一念未償代畢生前之願敬
殫誠赤仰瀆穹蒼伏念臣某亡室某人曩因懷妊之初
嘗許保胎之善所冀誕彌十月人欲天從豈期凶變一

朝子亡母斷叫呼無地哀訴惟天恐日前之誓未償致
身死之魂猶滯敬為還賽少助超升伏願上聖垂慈列
真肆宥三官罷對頓消黑簿之愆八景超生蚤注朱陵
之籍

翰苑新書別集卷九

欽定四庫全書

翰苑新書別集卷十

疏語

天基聖節道觀啟建

方秋崖

聰明而作元后有開繞電之祥富壽以祝聖人肅奏望
雲之請春融藥笈天贊羅圖皇帝伏願道邁崆峒世縣
郊廓洛書五十六字休符丕赫於龜文天皇萬八千年
厯數莫窮於鳳紀

天基聖節僧寺啟建

方秋崖

法王真子為世界主天開夢日之符大地衆生禮毗耶
身人致望雲之祝弘敷玉偈丕贊金輪皇帝伏願如不
動尊獲無量壽南閻浮提北鬱單越盡被堯仁大周沙
界細入微塵難窮舜歷

天基聖節啟建

劉後村

秦臘倣臨將及春回之候夏正甫建有開震出之祥敢
傾葵藿之心仰祝春松之筭伏願皇帝陛下壽齊箕翼

福等岡陵崑丘王母之桃靡煩來獻海上安期之棗不
必遠求

皇太后聖節啟建

戴象麓

日占南陸千齡開慶月之祥星拱東朝百拜祝齊天之
壽歲儀梵典贊慶昌時壽明皇太后陛下伏願齊光北
辰悟妙西竺千百佛裏比侔無量壽如來億萬年中擁
佑當今新天子

天基聖節道觀滿散

方秋崖

王者大一統肇新紀鳳之元中國有至仁誕啟流虹之
旦懽騰羽玉頌決雲璈恭願如日之升與天無極九五
福曰壽曰富適符華祝之三八千歲為春為秋長燕嵩
呼之萬

天基聖節滿散

劉後村

春王正月方欣木德之回天子萬年式慶蘿圖之永聲
輿情之懽抃祝睿筭之延洪伏願皇帝如日之升體乾
之健幽人為酒告農扈之屢豐都護奉觴喜邊烽之早

息

天基聖節僧寺滿散

方秋崖

現在佛作人天師道新寶歷長壽王等虛無界光啟瑤
樞香深圓玉之春雲麗側金之瑞恭願盡未來世居無
上尊圓天為蓋而方地興悉歸禹會大海運墨而須彌筆
莫紀堯年

進功德疏

劉後村

昊蒼眷命聿開王者之興臣子愛君均願聖人之壽輒

憑善頌仰贊脩齡恭惟皇帝陛下保大定功無為恭已
大德者名位必得光紹鴻圖善治則福祿日來駢臻景貺

壽慶滿散

方秋崖

風薰慈極天開必壽之期雲麗殊庭人獻無疆之祝
瓊璫而上立遡珠藥以蒿呼皇太后恭願道邁希夷心
游清淨芝翻玉圃莫窮物外之春秋桃熟瑤池不息人
間之雨露

天基聖節放生

方秋崖

惟我宋其仁如天魚躍鳶飛俱入華胥之國鳳儀獸舞
嘉娛長樂之朝於萬斯年自今以始

祈雪疏語

戴象麓

某神竊惟冬序常暘雪不時若凶咎之證蓋在來年民
有疫癘之憂農有旱蝗之慮二者皆令之責也惟神血
食茲土寧不均任此責乎願從三臘之時早見六花之
瑞則令之與神庶無愧矣

就靈巖祈雨疏

吳雨巖

種不入土比常時之旱不同心切望雲合一鎮之辭致
禱惟我佛不違於本誓念此方皈敬者幾年陰雨膏之
要必滿盈而後可大命近止不容感應之更遲

祈雨疏

戴象麓

六月不雨最切農憂三日為霖全資天澤痛惟彫弊之
邑屢當劫燬之餘今雖莫居猶多艱食惟望今歲之小
稔以救餘生之倒垂况茲近郭之田亦多早熟之稻谷
垂頭而將實民枵腹以待餐忽旱暵之彌旬恐秋成之

失望民苟弗食吏將疇依爰漑控於丹誠乞垂憐於赤
子錫以霖霖蘇其焦枯俾早穗之既堅仍晚苗之俱茂
窮閭委巷苟或免於啼號下吏小官庶少逃於憂責

就羅巖祈雨疏

游時齋

旱不苦禱而雨恩屢拜於二天魁為虐恠如焚憂復深
於七月哀籲稽望霓之首諄勤拳叩地之誠伏念某等
列井受塵聚廬托處生計頃殘於紅首年饑復困於黑
膚兩遭時變正不聊生三遇天災豈能堪命自入夏折

龜疇之兆至開秋息埵鵲之鳴石且泉枯日如火烈早
稻所取空於無粒晚禾之命危亦懸絲觸目啣酸痛心
若割况鄰里均蒙於時注獨此邦未沐於天恩胡寧瘡
我於至斯所恃賑投之有所更三日不雨可知嗣歲之
饑是八月飛霜尤慘前秋之禍仰瞻靈岳夙眷敝鄉合
庶信之精虔遣二生而躬禱伏願金華駕鶴玉洞呼龍
飛雲駕掣風駟速流雨澤鞭雷車搖電幟盡瀉天河閔
予瘠土之民轉作豐年之象

謝雨疏

方秋崖

五月而種不入正愆梅潦之黃一雨而苗則興已喜稼
雲之綠靈饗斯答嘉澤惟均曰雨曰暘曰燠曰寒曰風
曰時願調玉燭既種既戒既方既阜既堅既好迄至金
穰

祈晴疏

吳雨巖

歲本不稔粒食可憂雨復妨收人情益恐青空者既已
絕腰鎌之望黃熟者又未有登場之期垂成若更害成

小歉必至大歉率籲衆感敬叩佛慈急掃陰雲大開天
日及時刈獲俾無禾耳之災傷庶表神靈大副農心之
懇款

祈晴疏十月收禾次還願併祈晴

戴象麓

十月獲稻一年之計所關久雨妨農八口之家奚望况
艱歉不堪於去歲而收成全仰於今冬柰積潦之連綿
阻及時之收刈禾浸淫而生耳農憔悴以焦心當贊辦

香恪陳淨願雖荷皇天之感格日脚方晴奈何宿靄之
陰沉雲頭復雨彷徨无措老弱奚歸茲衆賽於無因庸
再伸於前懇伏望神心垂憫佛眼回光岩谷陰消開一
天之霽色倉箱日入騰萬戶之驪聲

祈晴疏

方秋崖

六月之雨則書雖云志喜三日為霖以往寧不懷憂於
以見造化之難其何厭民情之瀆伏願陰雲解駁陽光
開晴過則為災未害金烏之赫休其時若遄歸石燕之

飛

謝晴疏

方秋崖

自春徂夏每虞陰沴之淫維麥有秋式對陽光之赫敢
忘歸貺肅以薦嘉蠶事畢而田事興已慶年豐之喜割
者晴而耕者雨尚邀時若之休

代祈男子疏

戴象麓

竊以天上麒麟數載未符於吉夢人間龍鳳何時方見
於吉祥孟軻與不孝之辭伯道起無兒之嘆切效尼山

之禱冀儲崧嶽之靈云云昂宿遺精誕蕭何而安漢長
庚入夢生李白以扶唐佇看照室之祥即獲美璋之慶
英姿同伏湛稟容貌以堂堂餘慶若徐卿生公侯而袞
袞

許佛願賽還疏

戴象麓

伏以人圓顧而方趾生長皆天日飽食以煖衣依歸有
地雖大造未嘗責報然凡情豈不知思伏念某形骸寓
宇宙之間頂踵皆乾坤之賜第人愚若不自覺而日用

豈能無非纔投謝過之誠果獲降康之祐一年安靖八
口齊全心銘篆以難磨身粉蓋而莫報敬消吉日薄賽
前因庶憑圓滿之功終沐保全之惠伏願人人有慶目
前之老穉團樂日日無虞意外之災屯解釋其為感幸
罔罄敷宣

尉司方級就本尉廟許佛願乞保捕寇還願

戴象麓

正直為神肯許陰邪之肆侮慈悲惟佛豈容殺戮之張

威纔控懇祈即蒙矜閔於軍陣恐怖之中而能施無畏
使草木恍惚之狀而皆化為兵羣光颺除百姓堵按陰
功所獲如此人心敢昧依歸爰消吉辰敬賽前願伏願
豺狼屏迹自今永無烽火之虞鴻鴈安居至老不見兵
革之事現前人口等咸乞保全以上父母官更祈庇祐

翰苑新書別集卷十

欽定四庫全書

翰苑新書別集卷十一

冊文

朝享太廟聖祖天尊大帝

明堂大禮
前一日

劉後村

伏以物本乎天人本乎祖維帝之盛有光義農垂裳之
化合宮之制千載而下猶想其風慶源既行施及冲眇
茲卜季秋歲事國陽啟佑後人迓續休命

祖宗帝后

劉後村

伏以猗歟我家以聖繼聖帝德之盛若古勛華后範之懿曰女堯舜遺此艱大集于菲涼屬修宗祀前期以告洋洋如在神之格思亦既受祉施于孫子

昊天上帝

劉後村

伏以帝監四方眷宋不釋惟德是輔詎天我私農扈有積邊烽息警駕匪人力真宰之功仰觀星象俯練時日曷謂大饗亦惟小心其億萬年對越景命

皇地祇

伏以莫厚於坤故能載物王者母事自古則然生齒雖蕃地道亦敏都人足食歲事垂成后土之功與天同大茲卜素商肇修宗祈廼薦黃琮以徼終惠

太祖皇帝

劉後村

伏以天厭五季真人勃興黃鉞一麾僭墨電掃實開有宋無窮之基創造孔艱揖遜不有帝庸眷顧詒萬子孫作憲累朝歲事重屋曷敢不恭威靈在天

太宗皇帝

劉後村

伏以聖矣熙陵舜受堯禪六合一家偃伯崇儒以武戡
亂以仁立國軼漢跨唐與周比隆曾孫纂承懼德弗類
屬嚴大報敢薦微忱詒謀既遠流慶未艾

寧宗皇帝

劉後村

伏以於皇聖考侔德舜文宵衣之勤澣服之儉天輔有
德民懷有仁眇予冲子羨墻如見付託之重大懼弗當
屬修宗祀嚴父配帝赫赫濯濯實照臨之

祝文

明堂大禮修整雅飾太廟大殿并四祖殿合用

吉時奏告神御還殿

十七首
共一詞

劉後村

伏以練日精禋前期藻飾迨茲竣事將以妥靈維列聖之顧歆鑒冲人之寅奉

正奉安

十七首
共一詞

劉後村

伏以有司飾設奕奕孔新列聖威靈洋洋如在剛辰允協神御迺安佑我後人成茲熙事

仲秋潮旺祭告南瀆大江昭靈孚應威德博濟

王一首

劉後村

伏以一馬渡江六龍駐浙惟天設險拱護行闕川后波
臣受職于朝壁靡沉河弩不射潮茲卜季秋聿修大報
徼福爾神前期以告

從祀五廟一首忠武英烈靈衛顯聖王靈濟顯
佑威烈昭順王英烈王忠應協貺聖佑公善應
安濟孚佑顯衛侯

劉後村

伏以六飛省方百神受職濤江無波如行枕席農畝有

秋相安耕織維彼小民謁焉必獲矧國大祀敢不以白
捍我金隄相我寶穡既成熙事亦永血食

滿散五嶽四瀆二首

共一詞

劉後村

伏以國家大饗預消剛辰川嶽靈祇首列祀典屬將嚴
事敢不告虔相我縉儀冀神陰賜

明堂大禮分詣祭告九宮貴神

劉後村

伏以國之大祀卜用剛日天之貴神祭有常儀即壇而
享以徹靈貺既相熙事且祈豐年

分祭太社太稷二首

共一
詞

劉後村

伏以自古建國莫重於社

太稷改云
以稷配社

著在祀典有屋而

壇雨暘必謁况乎種類敬奉牲幣且謝且祈

分祭后土勾龍氏后稷氏

劉後村

伏以三歲大報咸秩百神惟勾龍氏

后稷改云
惟后稷氏

有功萬

世乃飭祀典寅奉潔粢願相歲事溥歌華黍

明堂大禮前二日朝獻景靈宮分詣祖宗帝后

一首

劉後村

伏以涓剛蒞祀先事告期將禮有嚴方奉周京之邁亘
孝思尤切仰瞻漢廟之衣冠尚啟後人迄成熙典

明堂禮畢祭謝嶽瀆一首

劉後村

伏以比選吉辛肇修宗祀寅畏嚴恭之念可質幽明濛
鴻嶸峨之神若通肸鬯逮茲成禮敢不薦忱

明堂大禮畢告謝五嶽四瀆

劉後村

伏以屬者大饗徧于羣神爰及熙成莫非隲相竭精忱
而推謝冀肸鬯之顧歆

已上並係
內制祀文

督視府拜學

方秋崖

某待罪二府不能宣皇威遏寇虐以上勤天子之憂顧
乃發大號俾出視師任重力綿夙夜懼弗克勝任惟古
受成于學獻馘于泮兵固非司馬法也聖門大訓具在
六經昔者嘗竊聞之某不敢諉曰軍旅之事未之學

謁學

建陽
宰

劉後村

昔者聖門弟子莫不以治邑為難況今之邑尤難於夫
子之時某之才不足進於弟子之列特以格法來領民

社其何以慰塞是邦父兄耆舊之心哉抑權力雖輕法令雖密若夫離於理而背於訓者某不忍為也況夫子巍然臨之乎

帥幕謁學

方秋崖

某祇惟先聖之言曰軍旅之事未之學也而某何人敢贊籌幄其敬率聖訓勉哉維忠

除漕謁學

劉後村

戍久而士不飽糴多而民艱食今日上下之通患也上

既妙選常平使者專任糴事復使某就補漕臣之憂
深責重上何以裕國下何以寬民哉昔者聞諸夫子曰
百姓不足君孰與足某力之所及不敢不勉

謁文公

劉後村

鳴序巍巍文公宋之夫子翼翼考亭建之闕里竹林肅
肅下有精廬於此授徒於此著書後千百年過者必式
拜俯洒掃邑令之職昔祀于寢今遷于堂配以高弟皦
如茲觴

謁韓文公

劉後村

鳴虜先生立身之名節垂世之文章史臣比之山斗不可學也至於出牧潮袁二州之人皆奉嘗之至今則某願師

謁濂溪祠

劉後村

本朝至熙寧間事始多而法稍密矣先生於是時奉使嶺外能使遺民奉嘗之至今此後學之所當師法也詩不云乎誰謂華高企其齊而

祝文清公游默齋

楊大雷

惟公伊川之後何其赫赫乎吾視蔡悲之幸其有御史
馬南軒之後何其泯泯乎吾視韓傷之幸其有先生焉
故先生之道脉最的師傳最正其高明而密察者簡而
文也其剛勁而脩潔者聖之清也一默所詣與魯參之
唯同科一誠之會與顏氏之勉同夢學宮翼如遺像儼
如邊豆秩如典刑炳如其謹率諸生以共灌獻肅如也

謁諸廟

方秋崖

某蒙恩假守蓋與爾明神分職于是邦使曲如鈎濁如泥而貪如狼某則罪矣爾明神其殛去之時雨暘平寒暑使物不疵癘而年穀豐熟則將誰責而可某亦不敢不以告

謁諸廟

劉後村

國家秩祀百神選任羣吏凡以為民也吏無愧於民斯無愧於神矣神有德於民斯有德於吏矣某與神皆當勉之敢告

諸廟祈雨

劉後村

某于茲守土荷神之休四封之內良苗滿野涉旬不雨
已覺亢乾一稔之望在民甚切常暘之欲在吏甚恐辦
香稽首神其格斯油然沛然以相歲事

諸廟祈雨

方秋崖

中夏大雩月令也相彼南畝維其龜矣有芄者苗亦既
萎矣吁嗟雩兮雨其時也

城隍祈雨

戴象麓

吏以三年濫宰斯邑神以累世血食此邦歲之豐凶吏與神均任其責矧今早田既穗一雨頓愆雖吏之過亦神之羞敢以誠告于神亟請于帝大霑甘霖相我豐年則吏之與神其責塞矣

諸廟再禱

劉後村

某屬以庚子禱於祠下爰及癸卯天瓢翻瀉一溉之餘旱苗小蘇俄復開霽焦卷如初連朝雨意風吹雲閣咎孰執哉由吏德薄不腆牲幣既格且祈願續前功神亦有依

諸廟謝雨

劉後村

某垂去禱雨人哂其迂神獨顧歆如鼓應枹甘霖達旦
焦卷者甦黼黼原田今飴昔荼乍使愁歎轉為歌呼神
功昭昭汝忘之乎卮酒不腆神必我孚

諸廟祈晴

劉後村

嗚呼昔者雨禱而止田倍熟民大喜曾幾日雨不休民
皇皇喜者憂民無辜咎在吏神其忍虧一簣決雲霧舒
陽光民歌舞神樂康

庵山祈晴

建陽

劉後村

鳴虜穀自布種下秧以至於秀實其成之艱矣農自于
耜舉趾以至於刈穫其致之勞矣忽雨不止坐妨收藏
嗚虜成之艱致之勞者豈不甚可惜乎天乎神乎忍為
之乎某憫農夫之勤苦悼小民之怨咨耳簷溜如聞啼
號目嘉穀如割心髓奔走羣望未繇嘉應惟神受百年
血食之奉王一方雨暘之權用敢躬謁祠下稽首祈哀
神其驅掃陰霧軒露霽華既全歲功亦活民命

諸廟謝晴

劉後村

鳴虜秋冬之交兼旬陰霾坐憂嘉穀化為荒萊惟神之
仁謂民孔哀歛雲歸岫杲日昭回場圃之間歡聲如雷
晴本愆期雨不為災神於吾民真有思哉迺挹澗泉注
此一杯

蓋竹廟謝晴

劉後村

九月庚辰至於乙未霽雨不止幾敗歲事某恐懼齋祓
乞靈於神升車而簷溜止出郭而宇氣清趨廟而午霧

開返舍而暮霞出如是旬浹霽畢被野田里相慶場圃
畢功鳴庠神所以廟食吾邑歷數百年如一日者豈偶
然哉不腆卮酒敬答靈貺

焚黃祝文

寶慶乙酉

通奉大夫

劉後村

先君之沒十有三年不肖孤克莊皇皇恤恤行路萬里
始忝朝籍而贈先君三品鳴庠所以顯揚其親者如此
可謂微矣雖然國恩也君命也先君之教也不敢不告

紹定戊子

正奉大夫

劉後村

今上初郊詔加先君一品惟中年不肖孤克莊試邑秩
滿始奉綸命歸白松楸夫君恩未易報先訓未易承也
敢不懼哉

紹定辛卯

宣奉大夫

劉後村

去秋天子有事於明堂加惠溥率無間幽隱克莊雖觸
罪奉祠猶得以追榮先君鳴庠罔極之恩不可報已往
之過不可追方來之善猶可勉也惟忠惟孝可答君父

敢奉新命以告

紹定癸巳

銀青

劉後村

迺者明禋禮成祭澤優渥小大之臣皆得以榮其親於是先君復進兩秩夫官至二品其儀與物亦稍異矣豈非聖王之隆恩先君之盛德乎克莊等敬奉所謂暈錦綢袋者白之松楸

嘉熙丁酉

特進

劉後村

去秋禋祀先君以三子陞朝進秩二等明年冬克莊免

官還里克遜懷詔過家克剛方忝邑寄命楚恭奉制書
白于墓下自官制行而特進為丞相官寵光之萃戶門
極其厚矣忠孝以報君父可不勉乎

嘉熙己亥

少保

劉後村

亞保古之三孤今之一品仕而致身于此者幾何人哉
沒而繁官至此者又幾何人哉拜朝廷之優恩與門戶
之積慶敬奉綸言白之松楸

淳祐癸卯

少師

劉後村

國家於祭澤無所靳於贈典有所止師臣極品不可以
復加矣然音容之隔一世矣宰上之木參天矣諸孤或
仕或止燎黃者七始拜今命寵光之隆異歲月之久長
雖榮也抑所以為懼也惟忠惟孝盍各勉旃

淳祐己酉

齊國夫人

劉後村

去秋裡霈吾母自魏封齊綸言及門已不及見嗚呼若
子若孫謂迎錦誥拜於膝下安知乃奉密章燎於原頭
即逝者有知必歆君命嗚呼痛哉

端平乙未

安人

劉後村

粵者國有慶典中外命婦序進有差而君蚤天獨不見及茲以祭澤始霑再命夫死生契闊人世之至痛也存沒哀榮朝廷之異恩也日吉時良燎黃于阡君其敬以答休寵

淳祐癸卯

宜人

劉後村

屬者裡祀上有異恩加惠羣臣及其妻息憶甫忝初補宜人加三命於是西樓宰木已拱鳴序白日長夜之訣

余固已沉恨於一生矣照天漏泉之澤君得無少慰於
九原

淳祐己酉

恭人

劉後村

頃侍旃厦祀禮徹章竊奉綸言進秩元士雖不旋踵去
國然祭澤之行无間中外明府登臚仕恭人加封爵鳴
庠父子夫婦蒙被國恩如此將何以為報哉敢告

翰苑新書別集卷十一

欽定四庫全書

翰苑新書別集卷十二

祭文

祭晦庵朱文公墓文

趙庸齋

唐石九峯兮矯如龍游峰下寒泉兮玉脂浮浮中有蓋
世翁兮一丘翁不見兮焉求陳四書兮翁在此亦既見兮九
峯山水竭吾力兮不能忘金風吹松兮琅琅溪並峯兮
石啣足角巾露衣兮來薦秋菊窮源兮大林谷古木千

章分珮鳴鏘鏘仙人來分紫陽視世擾擾兮聖哲皇皇
昔可詣兮雲一壑來日大難兮九原又不可依歸云讀
吾書兮猶自可樂尚饗

祭杜丞相

代太學

方秋崖

嗚呼天下不見司馬文正之忠清粹德兮於今百六十
有二年世道之升降凡幾人材之消長凡幾蓋有不勝
其然者矣而公方起從海濱共更化絃一時之兒童走
卒亦皆論名氏兮而都人士之攀緣相登爭覩其儀形

者亦皆咨嗟太息以為甚矣其似文正也是何退然山
澤之儒臞如列仙上方舉國以聽焉而四方顛顛延頸
跂踵以望太平之期兮奈何乎心勦神疲於應物其胃
中之所欲為者曾微江河之一涓雖移疾者屢然猶國
有著龜士有砥柱若不見其運動兮而君子恃之以無
恐小人警焉而莫前今夫矣而未遇復矣而未泰兮政
升降消長之一機也而公乃騎箕尾而舍旃將恐上心
漠然於此矣而元衮亦無與相彌縫兮凡吾黨之所扼

脫者固匪人之所垂涎天下之勢方如駕漏舟於風濤
浩渺之衝兮忽楫推而維絕則旁觀之損神亦不自覺
其失聲而呼天試嘗評之公之與文正其清介同其公
忠同其夙夜盡瘁以遺其身者無不同兮獨秉國不及
於踰年而青苗助役之來前然而青山流水居無五畝
之園以獨樂花木之秀野而藝風煙兮則公之貧又似
乎差賢意公之心使朝廷清明常如今日不至於變恠
雜出舞魴鱔而號狐狸兮羌瞑目於九泉古所謂死而

後已者其公之謂分吾為天下悲而已矣不自知其涕
漣

祭鄭丞相文

劉後村

曩遭詩禍幾置臺獄公在瑣闥力解當軸端平爰立擢
太尉掾思堂密詢翹館燕見嗟我於公合非勢利相賞
文字相勉道義丙申之斥流落稍久書來慰藉期我無
垢丙午之斥冒雪祖道自方田畫期我鄒浩再相五年
我臥空谷初辭方旌繼惟風木晚迫而起公愈貴重豈

無愈寔猶冀採用我欲白事公罕揖客先範之門累月
掃迹乞骸掛冠疏至八九匪曰潔身實懼濡首他人受
知一身而止我銜公恩昆弟父子百口託公隻手卵翼
一日無公羣臂彈弋衆方迫切訶罵佛祖我獨迂緩援
引馬呂勸容直言勸收善類為鼓邪說為懷私意及條
故事及進密疏為徼後福為沽虛譽或云范公稍恠守
道亦曰涑水欲逐坡老匪公厭倦實我窮薄白簡誅心
青雲失脚尚意汾陽考二十四且謂潞國壽九十二萬

一他日訪公於鄧午橋酒邊半山驢後憶初出晝飛輦
惜別寧料此行遂與公訣舊學之尊上宰之貴黼宸輟
朝玉鉞卓地而況諸生視公猶父山川脩阻不克奔赴
公來現身公去振臂公無生滅我有榮悴舉世攻詆獨
公嗟惜嚴光狂態劉蕡風疾邪說私意則已順受虛譽
安在後福奚有惟今之人尤工論議先以為合後即為
貳嗚呼剖胷出心刮眚見血公昔當國容有未察舍之
則藏死而後已公今在天其知之矣

祭游丞相文

劉後村

於惟聖宋名相比肩萊公英偉或惜其學之未至涑水
純粹或疑其才之稍偏堂堂克齋庶幾於全其師旨後
溪之密付其家訓忠公之嫡傳其論諫古人之遺直其
文章天下之至言其溫如春其重如山其虛如谷其靜
如淵寶紹之初已抱負夔高之望端嘉而後遂伯仲韓
富之間方爰立皆伏其德量既退處猶問其貌年倘斯
世之欲治盍再秉乎化權意歸袞之有日忽騎箕而登

天淒善類之相弔致遺恨於逝川惜當國之尤淺竟齎
志於重泉使久居於弼諧且傍無與撓牽其立政與造
事必揜後而光前嗚呼此謂之愛公可也要未為知公
者焉祁國梁溪僅三數月上印而去不失為賢苟為不
然雖久且專路公晚節出涕於落旄鉞槐相遺命祝髮
以易貂蟬孰如我公得閑於亡恙之日辭寵於未厭之
先於心無一毫之餒矣是氣塞兩間而浩然宜乎生荷
重名歿錫美謚勒之鍾鼎垂之簡言念昔者甲午初元

麟寺樞府兩相周旋每嘉史草亦獎奏篇公既登庸我
復招延十年久斥一日驟遷舉典故之稀闊越尺度之
拘攣雖薄材慙於韓陸然昭代炳乎淳乾在廷斷斷獨
公惓惓曾不旋踵局面覆翻公去廊廟我歸田園去夏
浪出宿痾沉綿作書訣公尚灑答牋我猶偷生公為飛
仙士懷一飯矧出陶甄道之云遠阻哭墓阡些誄卑謫
萼鯽酸寒追記丙午攝之掖垣偶偕竹湖訪公畱連合
詞勸公時事實難方欲為國立太平之基豈可使身無

一日之安公拱手曰某有去爾子各勉旃其詞之嚴色之毅吾二人者退而歎曰此其所以為果山歟鳴虜公與竹湖莫起九原我著斯言以俟史官

祭蔡參政文

呂雨巖

天運難測天意難明朱夫子卒於庚申而公薨於己未甲子甫一周哲人之萎者二天運竟何如耶翁李師友之並自季公至公子孫父子也而處其道不為不行而亦未得以盡行其道天意竟何如耶惟公德業人主知

之士大夫知之兒童走卒知之而某早辱公知亦自謂知公之萬一者蓋衆寶皆有光惟大圭拱璧之光瑩而不為熒熒之光衆樂皆有聲惟金鐘大鏞之聲和而不為嚶嚶之聲故公之才不矜小能而可以尊主庇民開物成務是為有德之才公之言不騁遊辭而可以悟主覺民詔今傳後是為有德之言平時如不勝衣而其勇可以嬰逆鱗唾虎怒天下之勇莫能加焉是為有德之勇三學儒士稱為宗師四海善類目為宗主而未嘗沾

之以取名戀闕之心如丹去國之身似葉而未嘗矯之
以為節荷蕢未必知孔夫子之心尹氏尤不知孟子之
志心之可知者有限而公之不可知者無窮渾然蓋公
之學以誠久為造道之極致以知行為進道之兩輪其
成德若此故某嘗謂東坡言君實如麟如鳳朱子言明
道如祥雲如甘雨公之謂也山川幾年之鍾萃國家幾
年之涵養而又家學幾年之流傳師友幾年之磨琢而
後至斯而遽止於斯耶嗚呼痛哉學傳諸老而若虛位

至執政而若無公亦何憾於死蓋自今年孟春之槩以至未薨十日之書自若其死者屢矣曳杖之歌奠楹之夢夫子獨與賜言而他人不得聞嗚呼痛哉某辱公門牆深自植立梁木其壞榱桷何為而今而後可以推琴而絕絃矣公之言何日而忘予之悲何時而已三年心喪莫報知已

祭蔡大參文

李畏齋

伯玉

導河之源積石崑崙始汪洋而大肆益廣遠而瀚汭

惟公家世西山之孫文簡考亭之門既克積者累世乃
發揮乎久軒行誼足以為縉紳之望道德足以動冕旒
之尊作於其政則災天之風旱歲之雨見乎其容則秋
月之皎春陽之溫正色朝端則姦邪為之屏息祥刑外
服則民自以為不寃故其進也善類皆從而拔茹其退
也多士皆從而舉幡公雖遠避乎權勢肥遯於丘園而
今有識之屬望謂當贊化而調元夫胡山頽而梁壞而
典刑之莫存某辱公心腹之知感公道義之言絮酒不

得致千里之莫緘辭莫能挽三閭之魂嗟九原兮不作孰網紀於斯文

祭蔡大參文

葉西澗臺鼎

山頽木壞哲人其萎此非人事之細故端有關世道之盛衰文公既沒學出多岐高者馳幻誕之說拘者泥文義之疑矯者竊形似以蓋空中之質惟者飾艱深以文淺近之辭不有耆英孰挈綱維惟公以西山九峯為祖為父節齋覺軒為師合全體與大用於實踐救善類之

脉於瀕危一語弗酬接浙而馳故道合則黃扉紫闥重
金而疊組不合則廬峯雲谷幅帽而深衣何蒼生之無
福而天不憖一老之遺某依公通德閱歲將暮昔賦明
月而慨千里之隔今望數舍而無一會之期痛死生之
永訣庸殄瘁以興悲芻蕘薦忱匪哭吾私

祭蔡大參文

湯東澗

嗚呼我登公門近甫踰月樽俎笑言歡猶未減曷為轉
頭遽成死別駭計書之倏來為慟哭而摧裂哀哉一見

之頃乃為千古之別嗚呼惟公襟懷陽春志操玉雪身
處窮時國慮深切引裾廷爭中嘗激烈拂衣遠逝晚更
勇決而笑傲東山之野猶壁立南都之鐵天胡不相於
斯文遽殞此堂堂之襟烏嘗誦王會稽之語曰人物方
眇然而蔡公遂如此令人氣短而心折頃徒視為常言
今乃知其愁絕嗟人生克終之甚難必蓋棺而公論始
別公雖不盡究其壯猷天已竟全其大節持此見西山
與考亭庶有藉手而無愧色雖公高明獨憐憫拙念久

敬之情深撫近別而悲徹自聞公薨一飯再噎強書苦
懷馳溯心折老淚如傾何暇筆舌

祭魏參政文

代趙相公

方秋崖

嗚呼蜀自三蘇公不作於今幾何年分予嘗意其水惡
而山羞天地之秘寶韜光剷彩鬱屈而不平分故其發
也勃焉而有斐君子特立於西州學探邃古之奧文洗
時俗之陋而浩然於胷中者自一宇宙兮蓋蹴訓故之
圓而姬孔之與游以其精微者治身以其粗淺者治世

是心固將堯舜吾君民兮而不知一蓑杭之何以障百川於橫流彼誰其秉國之鈞如重陰且霾日月為之晦冥兮而矯然獨鶴之嘹唳乃欲空百鳥之喧啾抱遺經於荒遐之裔樂斯道於寂寞之濱者與歲月而相忘兮亦既築山房於白鶴之麓而眠雲卧雪吟風醉月侃侃乎其無物外之憂但遨嬉於翰墨之林而秦篆漢籀流落人間者太山一毫芒兮至其妙於心則伏羲以前之大易而筆於書則獲麟以後之春秋忽雲翳之劃開豁

中天之大夜下尺一趣諸老以來歸兮人固以為適當
太平之期願觀德化之成而衆君子之聚在本朝者殆
將人稷契而身伊周歷覽比歲諸賢之志各欲出其力
以救斯世之淪胥兮而彼蒼者天豈其不欲平治耶胡
駕言中道而摧輶西山其頽而天目之老晉陵之魁亦
相繼而凋落兮獨吾白鶴山人在而且猶旁睨如碁之
局孤閑橫水之舟然庶幾其可以繫中外之望以待天
人之定分而復乘雲氣騎箕尾渺松江以上征而不為

蒼生其少留疇昔之夜謁公南徐曰衆議之不可息而予亦信以為然分及今見之則慨歎其為李西平之子而嘉獎其為異於臧宮馬武之儔人生傾意氣耳故令聞公之喪晝喟而夜吁分而况朝失元老士失宗儒其將付斯世於悠悠乃作白鶴之些曰白鶴飛兮山之幽梳雪羽兮風颼颼時不與兮吾誰尤白鶴兮河之洲蘇臺杳兮雲正愁唳華表兮天知否

路哭祭真西山文

劉後村

嗚呼先生屬疾聞者齋咨上對近臣玉色不怡丞相移
書千里迎鑒下至閭巷婦女童兒皆曰哲人必介壽祺
云何一夕去而騎箕在昔范公方古高夔晚登政府不
至冢司學者至今致恨於斯然其謨畫畧已設施先生
視彼則尤可悲平生修方未試刀圭謂天無意斯文在
茲謂天有意一老不遺太平之望竟復何時禮樂之興
百年待誰嗚呼昔者之來大帶深衣都人聚觀公歸何
遲今者之還丹旒素帷都人相弔公去安之矧二三子

金史卷一百一十五 卷十二
久從吾師要經執紼於禮則宜屬畏簡書僅至江湄覆
此一觴慟置以辭嗚呼哀哉

祭虛齋趙端明文

劉後村

才非果難難於全嫩勝流高虛下調羈鄙公則異體庶
物兼該以理揆事以德勝才礫寇破樵郡邑無主公握
兩拳禦萬豺虎郵卒反側公徃建牙宥脅臬畔肅然無
譁公甚柔懦公不嚴酷惟廉惟恕羣狡讐服入繫金狴
出佩玉麟王曰遄歸余無親臣延和已見緝熙故事箕

哆民怨木妖國敝發明節卦規切斜封公每造滕天為改
容流傳萬口照映千載謂余不信有諫草在凡今公卿
貴則捐書公老愈勤甚於癯儒易通一書開闢未有不
知公者曰公洛叟既徹乙覽默契宸衷比於伊川未嘗
不同造物所靳非權與位至於學識獨不輕畀公所造
詣通玄入神非惟人媚亦恐天嗔昨賀蒲輪勸堅鐵壁
必不獲已迫而再出當世要務不宜三緘兒女恩怨姑
寘勿談答書繫節君真愛我傳聞開歲稍親藥裏心謂

微恙不為深灾方作箋諭廼以計來嗚呼幹方之畧元
凱叔子尋微之功康成輔嗣或者期公主眷時名今其
往矣議論必平嗚呼少小相與晚尤縷繆人亦有言聃
非同傳屬續遺墨何共諄諄宰上之題累吾故人我已
七袞公小二歲白首哭公寧非倒置我才雖竭尚可作
碑呼公不起孰知我悲

祭游勉之侍郎文

劉後村

於惟游氏遠矣淵源御史授業河南之門爰及黜齋學

於南軒公稍後出以麓和埧兄之賢季師之嫡孫匪曰
菁華先植本根嘉定之末端平之元犯雷霆威進藥石
言麟莫羈係鳳肯啄吞或勸少貶腐鼠嚇鷄法從非責
方面非尊案詔上雍頗疏扣閤身不敢私君不可諉本
懷止足矧迫耄昏力請得謝冥冥高騫一區之宅五畝
之園徙倚茂密掬弄潺湲名臣欲盡一老僅存品其清
操徐稱陳蕃訂其細行管寧邴原昔仕鳴珂公不其闕
每奉談塵亦同酒樽公晚東歸我適南轅坎壈百謫入

伏丘樊學痺偏枯併闕寒溫耳聞山頽淚如河翻殄瘁
情深哀誄詞繁空賦離騷安能招魂嗚呼哀哉

祭杜尚書文

方秋崖

鳳城岩堯湖山春只月戶雲房愜幽人只有癯者仙編
綸巾只左吾詩書石菰蓴只藐予過之孰主賓只偕一
道士鄭子真只詩以吾盟不吾嗔只月窮星回幾何是
只橐甕戟森來宣旬只銘常勒鼎粢經綸只文昌太微
履星辰只天飛泥蟠邈無垠只駕朱兩轡適予閭只公

既乘雲騎麒麟只聿其祥琴迅義輪只敢拜稽首誅憑
茵只植象環金儼綏紳只竿綠纛黃薦吾醇只列星在
天杳音塵只詩情不磨黥湖濬只

祭李秘監文

劉後村

龜山於京文定於檜初敬終暮倏我進退督之未相以
誦自蓋薦三十士往往名輩公當是時固嘗我豸居中
幾何旋踵斥外爾欲為者我不傳會我自立者爾焉能
浼憶與鐵庵博覽奏對於故紙中馳騁千載不著名氏

獨現光怪此必洞齋衆伏且駭奈何斯人留落嶺海彰
施藻火被之品瀨曼擊金石散為等籟挑抉蟲魚形諸
箋解家有論著國無華采士為時惜年不公待嗚呼疾
病則亂魏使昏憤歲晚語謬謝傳俎背公將易簣遺偈
痛快譬之虛空豈有成壞我嘗評公精博英邁詩學卜
衛文律崔蔡自昔黨議為縉紳害知我罪我以俟萬代
嗟同門生凋零誰在執別魂銷聞訃驚贖老語諄諄聊
寫悲慨

祭林武博文

劉後村

我嘗三入勸講代言君無一字及於脩門又嘗三黜貴
權嗔怒人畏傳染君愈親附念我暮齒諒我心忠饋藥
起疾貽書擊蒙衆方排我荆舒楊墨君顧以為鄉雲甫
白世故險巇人心塹坑晚欲託君患難死生昨枉緘題
惟非自札酸風吹訃白日永訣西山之門存者幾人又
弱一个莫贖百身嗚呼學可謀斷僅教胄子才可匡時困
衡疊至得祿幾何閑輒數暮寄巢蕭寺火輒隨之彼隕

獲者烜赫其間分劑於君獨嗇祝釐不飽營

闕

矣家尤蕭然始翁誦歿負骨歸寔後師夢奠

守死

闕

背徇義勇不可當今誰卹孤誰求赴喪卜

用何山葬以何日禮有匍匐老無筋力誄不盡哀哭不成聲英爽如生豈隔幽明

祭鄭常博文

劉後村

嗚呼自漢以來士以藝取童而習者不出科舉抄誦帖括締繪雕蟲芻狗既陳印之空空君則異是網羅貫穿

手不釋卷亦不退轉衆作姜爾君獨老蒼它人哀竭君
愈激昂早列西山文字之錄中之秀岩筆削之局使之
騰上鼓舞雷風炎紹汪綦乾淳周洪挾負奇崛寡諧多
迂暫牧揭陽俄謫潢浦談滯周南甫客襄西帝曰巫陽
女下招之豈無汾陽力援太白九虎守關一鴻避弋葺
履道宅繙善和書箒間孤榜花外小車君房言語李邕
碑板彼昏不見世有具眼在昔老師高第詵詵歲月電
往存不數人前誅洞齋未平幽憤奈何又傳苔泉凶問

辛亥之後我扶羸軀心頗羨君紅頰白髮棄我而先理
不可詰奇字誰問疑義誰質扁舟來訪翰墨尚鮮束芻
往弔筋力已憊天實孤我殲同學者退老西河僅一商
也平生苦心為書滿家傳之福郊或付侯芭我迫頽齡
涕不濡目故交欲盡如何勿哭

祭徐知郡文

方秋崖

始予栖遲如桐未絲璞未規也爨者

闕

之有則其

闕

奇也公顧曰嘻非熊非羆非虎驍

闕

獨已知也風櫺暑池高論炎義夜

闕

龍驪走蛟螭也予起鋤犂歸袖

闕

謂非羣兒我著龜也曾幾何

闕

參差而我心期鐵與磁也歲

闕

其物換

星

闕

簪盍勿遲于宦之岐或並馳也昔我來

思有傳者誰公之姜也我心則疑天實生猗竟何為也
風鬣霧鬚長鳴之達孰與羈也煩劇之治如理棼絲愈
剗劑也老筆聽辭如水之澌潮之滋也落落松姿秀目

踈眉

闕

宜也立之入墀則麟儀儀鳳師師也奈何乎

噫瀛溪

闕

終

闕

翩者旗回鴈之陞古驛悲也

時方偲偲

闕

也歲則一暮凶問我貽涕

漣而也曰旣有碑小作名

闕

勿辭也朋友道隳絮酒

則醺誰其驪也長夜渺瀰晤言如荒今已而也下亭之
祠有扈江籬尚薦詞也

祭岳武穆

代徐宰

方秋崖

神京鱗介腥衣裳三精霧塞天無光鼂啼鼂嘯紛披猖

中分宇宙何肺腸誰其與者淪網常受計於敵扼我吭
王心凜凜天蒼蒼以次束縛歸朝堂自南自北語已償
焉用與寇為斧斨為讎報仇胡不臧至今淮塹為河湟
每觀王傳心摧傷怒髮為立膽為張皇畀予邑於祈閭
聞王有像西山岡欲徃從之潔予觴簡書之嚴不我遑
今且去此何敢忘牲肥酒香差日良金戈鐵馬山茫茫

祭致政徐君文

方烏山

某敬以生芻之奠祭于近故致政徐君之墓而言曰嗚

呼甲辰之歲余觸禍機歸扣君門麻鞋布衣君笑且迎
握手勞苦通夕縱談具我難泰別去五載中心藏之遠
聞君訃弔賻不時嗚呼古人感激一飯昔者聖師脫驂
舊館余獨何為忽然死生恃有此心可通幽冥拙思之
文敢銘君墓不傳於今或俟於後持此報君於古庶幾
君可起乎來歆一卮

祭雪村處士文

方烏山

宋淳祐壬子二月甲戌雪村處士杜君清友卒于寢越

三日庚戌友人莆田方某以生芻之奠哭之曰予來幾
一年始識君與君會亦不過一再君死閱三日始知之
而不自知其哀之深慟之久者也君為詩人不臞而腴
常期君以貴君為世家不富而貧常期君以遠今也身
不得一命年不滿五十哀人生之無據慟神理之既絕
是何淺薄抑至斯極昔者期君嘗序君詩今者哭君遂
撰墓碑浮宮之梅君手所移梅存人亡如之何其勿悲
尚享

祭鄭伯舉文

戴象麓

嗚呼蕉隍鹿得喪真反覆白牛犢禍福苦倚伏賓王纔
貴肩已薦賈傅未幾舍先鵬傷哉好物不堅牢造化小
兒一何酷吁嗟今之人名韁苦羈束到底竟成空羊亡
兩臧穀惟兄獨超然笑傲升斗祿本期徜徉乎此生夫
何白駒之隙一箭速吁嗟今之人利錐太犇逐所競皆
毫芒蝸戰幾蠻觸惟兄獨恬然稍閑便濯足本期偃仰
乎此身夫何黃梁之炊一夢熟吁嗟今之人心機空勞

碌揮闔相戈矛狙詐百鬼谷惟兄獨坦然畧不事邊幅
本期寬閑乎此心夫河海漚之滅一瞬倏以兄之子職
恭親恩篤扇枕古黃香輟羹老潁叔自宜斑爾衣餽爾
菽以盡百年之歡睦夫何慈闈八十正春風子舍俄驚
日月促天理苦顛真塞馬不為福嗚呼悲矣乎髮星星
淚簌簌前年矢子正傷方豈堪此來又埋玉黃昏寂寞
倚門時人聞哭聲誰不哭婦惻惻中途苦脫輻千古斷
弦哀鸞膠竟莫續弟悽悽誰共春此粟首尾救急難鵠

原弔影獨子哀哀廢篇感我蓼依木苦無枝烏號上空
屋嗚呼悲則悲矣某年以葭莩之親盟亦桑梓之鄉曲
痛一別之不回嗟百身之何贖追往事於一時尚宛然
而在目敞南樓宴朋族漉黃花之烏巾燒海棠之銀燭
持蟹螯舞鵲鵲耳熱拊缶而呼嗚嗚慇懃勸我盃中醪
已矣乎今無孔北海欲舉此酒將誰屬風月閑主人款
客呼童僕設榻向窓紗一片紋楸三百六一子五十萬
布鴉三點兩點又落鵲忽然西南風

闕

拍手大笑驚

起邊韶腹已矣乎今無謝東山欲對此碁將誰屬野渡

橫舟落霞孤鶩有時得句動詩毫滿紙風雲

闕

黑

闕

驪龍珠縱橫草顛旭半天

闕

韻落人間壓倒池塘春

草綠已矣乎今無孟東野欲和此詩將誰屬伯舉兄休

休

闕

旅亭人生一旅宿自古本無千歲翁

闕

年登鬼錄榮與辱碁一局浮與沉酒一斛古今興亡


闕

來

闕

生涯此外形骸皆槁木生何足喜死

何足哀區區涕泗皆流俗



翰苑新書別集卷十二